

OFIS PUBLIK
AR BREZHONEG



OFFICE PUBLIC
**DE LA LANGUE
BRETONNE**

Diazevadur publik a genlabour sevenadurel
Établissement public de coopération culturelle

KELENN D'AN OADOURIEN BILAÑS 2011

OFIS PUBLIK AR BREZHONEG
Pol Studi ha Diorren
Arsellva implij ar yezhoù
2012

Hentenn labour

Etre an 10/11/11 hag an 28/01/12 ez eo bet kaset da benn an enklask war an niver a oadourien enskrivet er c'hentelioù sizhuniek (bloavezh-skol 2011/2012) hag an niver a stajidi (stajoù hir, ur sizhunvezh ha dibenn-sizhun), e-kerzh ar bloavezh-skol 2010/2011. **91% eus ar frammoù o deus respontet** d'an enklask. Istimet eo bet an niver a dud enskrivet er c'hentelioù brezhoneg evit ar frammoù chomet direspont evit gallout embann roadennoù hollek.

Sifroù pennañ	4
Kentelioù sizhuniek.....	5
Ur c'hinnig stabil a-walc'h.....	5
An niver a zeskidi a zalc'h da greskiñ	7
An niver a zeskidi hag o lec'hioù deskiñ.....	11
Ur sell war ar 6 vloaz tremenet.....	19
Kentelioù sizhuniek war al lec'h labour.....	22
Stajoù	23
Ar c'hinnig aet war raok evit ar stajoù hir	23
Ar goulenn stajoù.....	24
Ar stummadurioù hir	27
Pellgelennerzh	30
Ar vrezhonegerien stummet dre ar c'helenn d'an oadourien	30
Ar c'hinnig kentelioù e-maez Breizh	32
Klozadenn	33

SIFROÙ PENNAÑ

▪ **5 330** den deuet¹ o deus heuliet kentelioù e 2011 dre gentelioù sizhuniek, dre stajoù pe gant ar pellgelennerzh. **Ur c'hresk** zo en holl zoareoù deskiñ.

▪ **War-dro 500** den a vefe **aet da yezher** e 2011 (war-dro 485 den e 2010).

▪ **3 640 oadour** a heuilh **kentelioù sizhuniek** e 2011/2012 : 3 420 er c'hentelioù noz ha 220 er c'hentelioù kinniget d'ar c'hopridi war o lec'h labour. Ar 4^e bloavezh kresk da heul eo (+4 % e-keñver 2010).

▪ Gallout a reer bremañ deskiñ ar yezh enlinenn a-drugarez da Edubreizh. **Ur benveg a vanke kalz zo bet savet ganto.** War-dro 30 den a zesk da vat ha 250 den o deus lakaet o anv er forom eskemm. Gant ar c'hentelioù kinniget dre lizher e sav an niver ar re a zesk a-bell da ouzhpenn **400 den**.

▪ Kentelioù-noz zo e **171** lec'h (stabil eo e-keñver warlene). Dasparzhet eo al lec'hioù-se etre 150 c'humun² da lavaret eo 10% eus kumunioù Breizh (144 e 2010/2011). Stabil a-walc'h eo ar c'hinnig : 12 lec'h zo bet digoret tra ma'z eus bet serret 11.

▪ **Kresk mat** zo en 2 zepartamant a vod ar muiañ a zeskidi : **Aodoù-an-Arvor** (+14,1%) ha **Penn-ar-Bed** (+6,5%).

▪ **E bro Brest** emañ an niver a zeskidi er c'hentelioù sizhuniek en e uhelañ ; ar vro gant **ar c'hresk brasañ** eo ivez.

▪ **Roazhon** eo **ar gêr gentañ** atav evit an niver hollek a zeskidi, ha Naoned an eil.

▪ **Kresk** zo **en niver a stajidi** ivez : un tamm kresk eus tu ar stajoù hir (160 stajiad e 2010/2011 pa oant 150 e 2009/2010). Kresk bras zo bet er stajoù berr (+17,8%). N'eus nemet eus tu ar stajoù ur sizhunvezh ez eus digresk (- 5,5%).


¹ Un den a c'hall bezañ bet kontet meur a wech en hollad-se (unan a heuilh kentelioù noz ha stajoù e-kerzh an hevelep bloavezh, da skouer).

² En ur gumun e c'hall bezañ meur a lec'h deskiñ.

KENTELIOÙ SIZHUNIEK

UR C'HINNIG STABIL A-WALC'H

Bloavezh 2011/2012




Kempouezet eo an niver a lec'hioù serret (11) gant an niver a lec'hioù digoret (12). Dalc'het eo mat al lec'hioù digoret e 2010 ivez : an holl lec'hioù bet digoret e distro-skol 2010 a gendalc'h da ginnig kentelioù e 2011/2012.

11 lec'h zo bet serret, 7 anezho a oa kinniget gant kelennerien a-youl-vat.

Digoret ez eus bet 9 eus an 12 lec'h nevez **gant frammoù a vicher** (3 gant Kentelioù an Noz, 2 gant KLT, 2 gant Ti ar vro Treger ha Goueloù, 1 gant Skol an Emsav hag 1 gant Sten Kidna).




An niver a lec'hioù deskiñ –distro-skol 2011



Kresket eo an niver a lec'hioù deskiñ en **Aodoù-an-Arvor** a-drugarez da framm micherel nemetañ an departamant, Ti ar Vro Treger ha Goueloù, ha digoret ez eus bet kentelioù gant tud a-youl-vat. Er **Mor-Bihan** e teu ar c'hresk eus al lec'hioù kinniget gant **tud a-youl-vat** hepken. **War ziskenn** ez a an niver a lec'hioù deskiñ e **Penn-ar-Bed** : el lec'hioù kinniget gant tud a-youl-vat e stader un digresk kentoc'h.

Dregantadoù al lec'hioù deskiñ kinniget gant frammoù a vicher³




N'eo ket aet kalz war-raok ar micheleraat er 6 vloaz diwezhañ, **nemet e** Penn-ar-Bed hag el Liger-Atlantel. Kudennek eo stad an traoù er Mor-Bihan, un departamant ma'z eus kalz dale war frammañ ar c'helenn ha war washaat ez a.

³ Sellet a reer ouzh frammoù a-vicher ar re zo gant postoù kelennerien gopret.

AN NIVER A ZESKIDI A ZALC'H DA GRESKIÑ


An niver a zeskidi er c'hentelioù sizhuniek



Derc'hel a ra da greskiñ an niver a dud a zesk ar yezh. Adsavet eo an niver a zeskidi abaoe distro-skol 2008 (hag abaoe 2007 zoken evit an deraouidi). Adlañset e oa bet ar c'hresk goude meur a vloavezh digresk.

E-keñver 2005 ez eus 245 skoliad ouzhpenn, a-drugarez d'ar **frammoù a-vicher** dreist-holl : 47,5 % a zeskidi ouzhpenn zo ganto e-keñver 2005, gant nebeutoc'h a lec'hioù deskiñ, pa z'eus bet un digresk a 17,8% en niver a zeskidi er c'hevredigezhioù all.


An niver a zeskidi er c'hentelioù sizhuniek dre live



Kresk zo gant live an deraouidi, ha pa ne vefe ket ken kreñv ha warlene : +2,3% pa oamp gant +8,5% e 2010. An dud el live 2 zo niverusoc'h er bloaz-mañ dre ma oa bet kalz a zeraouidi e 2010.

Kreskiñ mat a ra al liveoù uhelañ. Diskouez a ra ez eo niverusoc'h-niverusañ an dud a ya betek penn o hent-deskiñ hag e teuont da vezañ yezherien da vat. War vrasaat eo aet ar c'hinnig evito ivez, e fin ar c'hursus (bodadoù-komz, bodadoù-lenn...), ar pezh zo mat evit peurstummañ yezherien.

Emdroadur feur kendalc'h etre live an deraouidi hag al live 2 e Breizh








Lenn : 65 % eus deraouidi 2010 o deus lakaet o anv el live 2 e distro-skol 2011

Stabil eo ar feur abaoe 2006, goude bezañ bet gwellaet kalzik etre 2002 ha 2004.

E meur a lec'h ne c'hall ket ar skolidi heuliañ ur c'hursus klok : ret eo dezho mont d'ur gumun all, cheñch kumuniezh-kumunioù zoken, alese kalz a dud o chom a-sav. Evit reiñ tro ha c'hoant d'ar muiañ ar gwellañ a dud da vont betek penn an deskiñ eo a bouez e vefe ur c'hursus klok tost d'o lec'h annez.

Emdroadur feur kendalc'h etre live an deraouidi hag al live 2 dre zepartamant




Solutoc'h eo ar c'helenn e Penn-ar-Bed, gant meur a framm micherel, ur c'hinnig tost d'an dud ha skiant bet prenet war dachenn ar bedagogiezh.

Solut a-walc'h eo ar c'helenn e kornôg Aodoù-an-Arvor ivez. A-live gant keidenn Breizh emañ feur an deraouidi a gendalc'h en eil bloavezh dre vras. Ar Mor-Bihan, daoust dezhañ bezañ an departamant m'eo diorroet an nebeutañ ar micherelaat zo a-us da geidenn Breizh. Distabiloc'h eo ar feur kenderc'hel-se avat.

Stabiloc'h ha brasoc'h eo ar feur kenderc'hel el Liger-Atlantel eget en Il-ha-Gwilen. Bras eo pouez kêr Roazhon en Il-ha-Gwilen ma kaver tost 2 zeskad diwar 3. Un tamm izeloc'h eo feur an deraouidi a gendalc'h en eil bloavezh e Roazhon eget e Breizh dre vras.






Ur c'hursus klok zo en un 1/3 eus ar frammoù etrekumunel (e 25 diwar 72).

Tu zo d'an dud deskiñ ar yezh da vat en takadoù m'emañ ar frammoù a vicher pennañ rak ganto ez eus ur c'hursus klok : Sked ha KLT e Norzh Penn ar Bed ; Ti ar Vro Treger-ha-Goueloù e Bro-Dreger, Mervent e Bro Gerne, Kerlenn Sten Kidna e bro an Alre, Kentelioù an Noz e bro Naoned ha Skol an Emsav e bro Roazhon. Dre vras ec'h adkaver lec'hioù kreñv ar c'helenn divyezhek ivez nemet e bro Gwengamp, bro Kornog Kreiz Breizh ha kreiz ar Mor-Bihan ma'z eo diglok ar c'hursus. Kursusoù klok zo en tiriadoù ma vez staliet abaoe pell ar c'helenn ivez, evel e Sant-Maloù pe Sant-Brieg da skouer.

E kreiz Aodoù-an-Arvor hag e Breizh-Uhel ez eus forzhik a lec'hioù kelenn na ginnigont nemet 1 live.


AN NIVER A ZESKIDI HAG O LEC'HIOÙ DESKIÑ

Dasparzh an deskidi er c'hentelioù sizhuniek dre zepartmant - distro-skol 2011



E Penn-ar-Bed emañ al lodenn vrasañ eus an deskidi atav (evel m'emañ kont evit an niver a skolidi divyezhek hag an niver a vrezhonegerien). Adkavet en deus e lec'h e-keñver 5 bloaz zo. Kreñvaet eo bet pouez Aodoù-an-Arvor er memes koulz (tremenet eo eus 11% e 2005 da 19% e 2011), dre labour **Ti ar Vro Treger ha Goueloù** ha gant kevredigezhioù all evel Kreizenn Sevenadur Breizh Pempoull. Muioc'h a zeskidi zo en Aodoù-an-Arvor eget er Mor-Bihan abaoe an distro-skol-mañ.

Emdroadur an niver a zeskidi er c'hentelioù sizhuniek dre zepartamant



2 zepartamant zo gant ur c’hresk mat abaoe 2007 : Penn-ar-Bed hag Aodoù-an-Arvor. Sifroù Aodoù-an-Arvor a oa par da re Il-ha-Gwilen e 2005. Abaoe int tremenet dreist da re ar Mor-Bihan. N’en deus ket ar Mor-Bihan kendalc’het gant kresk mat 2010 pa oa bet digoret an darn vrasañ eus al lec’hioù nevez en departamant-se. Dalc’het eo bet an holl lec’hioù gant un niver stabil a zeskidi koulskoude. Digreskoù bras zo bet e lec’hioù zo evel e Plañvour da skouer (echu ar c’hentelioù gant Kreizenn Amzer Nevez) pe serret ez eus bet lec’hioù deskiñ en departamant : n’eus kentel ebet ken e Pondi.

Niver a zeskidi er c’hentelioù sizhuniek –Distro-skol 2011

Dep.	Live 1	Live 2	Live 3	Live 4	Live 5 *	Hollad	Kresk kriz	Kresk bloaziek e %
22	212	128	125	77	114	656	81	14,1%
29	501	307	225	86	381	1 500	91	6,5%
35	102	86	53	47	28	316	2	0,6%
44	127	65	62	27	49	330	8	2,5%
56	229	161	112	32	81	615	- 92	-13,0%
Breizh	1171	747	577	269	653	3 417	90	2,7%
Kresk kriz	26	55	-17	-58	84			
Kresk bloaziek e %	2,3%	7,9%	-2,9%	-17,7%	14,8%			

 Kresk

 Digresk

 Stabil⁴


* Kavout a reer el live 5 : liveoù uhelañ hag ar stalioù-labour a c’haller kinnig d’an deskidi gant ul live uhel (strolladoù lenn, bodadoù-komz da skouer).

Ar c’hresk kriz brasañ zo gant Penn-ar-Bed gant ur c’hresk mat e-touez an deraouidi (+50 deskard, da lavaret eo +11%) ; er c’hontrol eo nec’hus sifroù Il-ha-Gwilen ma’z eus un 1/3 nebeutoc’h a zeraouidi er bloaz-mañ.

Un digresk a adkaver el liveoù etre : kenderc’hel a ra an hentad da goll deskidi etre al live 2 hag al live 3. Adkavout a reer muioc’h a zeskidi el liveoù uhelañ ma kaver deskidi e stalioù labour evel kaozeadennoù, stalioù labour aozet evit peurzeskiñ ar yezh. Bodañ a ra ar stalioù labour ouzhpenn an hanter eus deskidi al live 5.


⁴ Sellet eo ouzh ar sifroù evel sifroù stabil pa vez an emdroadur etre -5 ha +5.

An niver a zeraouidi ouzhpenn e distro-skol 2011




N'eus ket bet kalz a zeraouidi ouzhpenn e Breizh dre vras, nemet e Penn-ar-Bed hag el Liger-Atlantel e vefe. Distabil-tre eo an niver a zeraouidi ouzhpenn, -27 a oa e 2010 da skouer el Liger-Atlantel. En Il-ha-Gwilen e oa bet digoret kentelioù evit an deraouidi e meur a lec'h e 2010, evel e Felger pe e Bezeg. Kendalc'het o deus an deskidi o doa kroget gant o hent-deskiñ e distro-skol 2010 el live 2 ar bloaz-mañ (ur c'hresk mat zo el live 2 en Il-ha-Gwilen, ouzhpenn daougementet eo bet an niver a zeskidi el live-se). N'eus ket bet kendalc'het da ziorren dre zigeriñ lec'hioù nevez e distro-skol 2011 avat.

An niver a zeskidi er c'hentelioù sizhuniek dre vro - distro-skol 2011



Notenn : a-vent gant an niver a skolidi er vro eo pep kelc'h

Ur c'hinnig zo e 26 bro e distro-skol 2011. Ne chom nemet 3 bro hep tamm kinnig ebet. Ur vro nevez pourvezet zo en distro-skol-mañ : bro Kastell-Briant gant 2 lec'h deskiñ digoret. Morse n'eo bet ket bras ar c'hinnig. Ne oa nemet 22 bro gant ur c'hinnig e 2005 (ne oa kentel ebet e bro Felger, Ploermael pe Kreiz-Breizh da skouer).



Evel evit ar c'helenn divyezhek e kaver ar muiañ a zeskidi e bro Brest. A-gevret gant bro Gerne ez eo ar vro m'emañ en he stankañ ar rouedad lec'hioù deskiñ.

9 bro ne ginnigont ket ur c'hursus klok d'o deskidi, evel e bro Pondi ma ne c'haller ket mont en tu all d'al live 2 pe e bro Ploermael da skouer. E tost an 1/2 eus ar broioù n'eus nemet 1 pe 2 lec'h deskiñ.

Ne glot ket penn-da-benn kartenn ar c'hentelioù-noz gant hini ar c'helenn divyezhek. Kentelioù-noz zo e broioù hep kinnig divyezhek enno evit poent : bro Breselien, bro Felger, bro Raez Atlantel, bro Gwiniegi Naoned, bro Kreiz-Breizh.

Renkadur ar broioù diouzh an niver a zeskidi er c'hentelioù sizhuniek – distro-skol 2011

Bro	An niver a lec'hioù deskiñ	Live 1	Live 2	Live 3	Live 4	Live 5	Hollad	Emdroadur bloaziek
B.Brest	25	201	176	154	32	136	699	74
B.Gerne	25	186	93	27	27	108	441	28
B.Treger ha Goueloù	14	110	50	58	48	73	339	62
B.Montroulez	12	79	21	20	26	126	272	46
B.Roazhon	7	85	54	39	35	28	241	16
B.Kornôg Kreiz Breizh	14	92	41	51	8	41	233	14
B.Naoned	8	82	21	38	19	49	209	6
B.an Oriant	15	89	60	15	8	15	187	5
B.Kêr Wened	10	45	60	37	12	15	169	8
B. an Alre	8	53	13	47	5	25	143	10
B.Gwengamp	6	38	28	22	21	19	128	15
B.Wenn hag ar Briver	5	28	37	8	3		76	6
B.Sant-Brieg	3	17	18	19		18	72	2
B.Pondi	3	17	25	-		-	42	15
B.Dinan	1	10	11	6	8		35	1
B.Sant-Maloù	1	12	-	6	12		30	6
B.Raez Atlantel	2	9	7	10			26	2
B.Breselien	2		7	8			15	18
B.Redon hag ar Gwilen	1	5	8				13	5
B.Gwitreg	1	-	9				9	2
B.Kastell-Briant	2	8					8	8
B.Felger	1	-	8				8	1
B.Gwiniegi Naoned	1		-	6			6	5
B.Kreiz Breizh	1			6			6	-
B.Ploermael	2	5					5	3
B.Kreiz Liger-Atlantel	1				5		5	4
BREIZH	171	1 171	747	577	264	653	3 417	

 *Kresk*

 *Digresk*

 *Stabil*


Er c'hontrol eus distro-skol 2010 eo aet **war raok** ar 5 bro ma vez ar muiañ a zeskidi (war bouez e bro Gerne). Ar c'hreskoù gwellañ en niver a zeraouidi a gaver e bro Montroulez, bro Naoned hag e bro Treger-ha-Goueloù.

Mat eo bet an distro-skol e bro Brest gant ur c'hresk hollek dre diriad ha dre live. Gant kresk brasañ broioù Breizh emañ bro Brest. Ken mat all eo bet an distro-skol e bro Treger ha Goueloù gant 2 lec'h digoret ha kresk e ouzhpenn an 1/2 eus al lec'hioù deskiñ. Deuet eo da vezañ an 3^{de} bro ma kaver ar muiañ a zeskidi pa oa ar 6^{vet} e 2010. Ul lamm en deus graet bro Montroulez ivez en ur dremen eus an 11^{vet} renk d'ar 4^{re}. Mat eo bet an distro-skol enni koulz gant an deraouidi (gant 2 lec'h nevez digoret ha daougementet eo bet an niver a zeraouidi er vro) hag an deskidi ampart.

Un digresk zo en un 1/3 eus ar broioù. Bras a-walc'h eo an digresk e bro Gerne abalamour da zigresk e 2 lec'h dreist-holl (Kemperle ha Konk-Kerne), met kresk zo gant an niver a zeraouidi.



An niver a zeskidi er c'hentelioù sizhuniek dre framm etrekumunel (DPKE)⁵ – Distro-skol 2011



Deskiñ brezhoneg a c'haller e 72 framm etrekumunel diwar 140. Lec'hioù pennañ an hentad deskiñ a gaver e lec'h ma vez ar muiañ a annezidi : Meurgêrioù Brest, Roazhon ha Naoned.

Renkadur an 20 framm etrekumunel kentañ diouzh an niver a zeskidi er c'hentelioù sizhuniek - distro-skol 2011

Renk	DPKE	Live 1	Live 2	Live 3	Live 4	Live 5	Hollad	Emdroadur bloaziek
1	Brest Meurgêr ar Mor	74	80	50		48	252	26
2	Meurgêr Roazhon	77	54	39	35	28	233	26
3	Meurgêr Naoned	82	21	38	19	49	209	17
4	KTk Lannuon	55	22	15	24	30	146	43
5	KTk bro Montroulez	42	8	-	15	79	144	27
6	KTk bro an Oriant	66	40	15	8	9	138	-37
7	KK Plabenneg hag an Aberioù	34	35	34	8	25	136	30
8	KTk bro Kêr-Wened	35	47	26	7	15	130	5
9	KTk Kemper	66	9	7	7	36	125	-3
10	KK Bro Landerne-Daoulaz	46	20	29	3	22	120	8
11	KK bro an Hirwazh	20	22	30	21	15	108	-30
12	KK bro Gemperle	33	22	6	8	22	91	-13
13	KK bro an Alre	27	13	22	5	15	82	5
14	KK Pempoull ha Goueloù	17	6	28	9	18	78	0
15	Sant-Brieg Tolpad-Kêrioù	17	18	19		18	72	2
16	KK bro Lannollon-Plouha	16	9	11	21	10	67	6
17	KK Bro Leon	8	8	15	8	26	65	-2
18	KK Bro Landivizio	29	5	5	3	21	63	21
19	KK an Teir Stêr	12	13	-	15	19	59	16
20	KK Bro ar Roue Morvan	20			7	26	53	-60

Kresk

Digresk


Stabil

⁵ diazevadur publik a genlabour etrekumunel

Kreskoù mat zo el lec'hioù pennañ. **Deuet eo Meurgêr Naoned** da vezañ ar framm etrekumunel **ma vez ar muiañ a dud o kregiñ gant an deskiñ**. Ul lamm zo bet graet gant K.T.K⁶ Lannuon ivez pa oa an 13^{vet} framm gant ar muiañ a zeskidi e distro-skol 2010 : deuet eo da vezañ ar 5^{vet} en distro-skol-mañ ha kresk brasañ ar frammoù etrekumunel. Ouzhpenn daougementet eo bet an niver a zeraouidi eno, gant ur c'hresk hollek er 6 lec'h deskiñ, 5 anezho meret gant Ti ar Vro Treger-ha-Goueloù.

Gant un digresk bras emeur e K.K. Bro ar Roue Morvan abalamour d'un emdroadur er c'hinnig zo oc'h en em adframmañ. Adkemeret ez eus bet kentelioù zo eus ar gevredigezh an Ti Glas gant ur gevredigezh nevez krouet er vro, Bod Kelenn, he fal dezhi diorren ha frammañ ar c'helenn e Bro ar Roue Morvan. Un digresk zo e An Oriant Tolpad-kêrioù abalamour d'an digresk bras e Plañvour.

An 10 kumun enno ar muiañ a zeskidi – distro-skol 2011



Kavout a reer er renkadur-se lec'hioù pennañ ar c'helenn divyezhek (Roazhon, Gwened, Kemper, Naoned, an Alre, Landerne) anezho sez ar frammoù a vicher ivez alies.

Montroulez ha Lannuon a ya e-touesk an 10 kumun gentañ ma kaver ar muiañ a zeskidi en distro-skol-mañ. Ur c'hresk bras zo bet en 2 gumun-se a-drugarez d'ar frammoù a-vicher. Daougementet eo bet an niver a zeraouidi e kêr Lannuon da skouer.

Ne adkaver ket kêr Kemperle na Plañvour m'eo aet war gil ar c'hinnig kentelioù. Lec'hioù pennañ ar c'helenn divyezhek a vank ivez evel an Oriant, Gwengamp pe Karaez-Plougêr da skouer.

⁶ Kumuniezha Tolpad-Kêrioù

An 10 kumun gentañ diouzh o niver a zeskidi + renk ar c'humunioù pennañ – Distro-skol 2011

Renk	Kumun	Dep.	Live 1	Live 2	Live 3	Live 4	Live 5	Hollad	Emdroadur bloaziek
1	Roazhon	35	63	41	18	35	28	185	19
2	Naoned	44	59	21	11	19	49	159	15
3	Brest	29	48	47	24	-	21	140	5
4	Kemper	29	38	9	7	7	19	80	5
5	Montroulez	29	15	8	-	9	46	78	40
6	Gwened	56	24	19	13	7	15	78	5
7	Alre (an)	56	23	4	22	5	15	69	13
8	Lannuon	22	27	12	4	14	9	66	13
9	Pempoull	22	13	6	17	9	18	63	- 5
10	Landerne	29	31	9	7	3	9	59	20
14	Sant-Brieg	22	10	14	8	-	18	50	-
16	Orient (an)	56	24	17	-	-	-	41	8
20	Lesneven	29	11	10	4	-	15	40	23
23	Dinan	22	10	11	6	8	-	35	1
32	Sant-Maloù	35	12	-	6	12	-	30	6
34	Douarnenez	29	10	11	8	-	-	29	4
37	Gwengamp	22	13	9	4	-	-	26	4
51	Bruz	35	12	9	-	-	-	21	13
56	Gwenrann	44	9	10	-	-	-	19	- 6
58	Sant-Nazer	44	8	7	4	-	-	19	1
83	Redon	35	5	8	-	-	-	13	- 5
112	Lannarstêr	56	4	5	-	-	-	9	- 1
114	Gwitreg	35	9	-	-	-	-	9	2
149	Ploermael	56	3	-	-	-	-	3	- 5
-	Pondi	56	-	-	-	-	-	-	- 31

Kresk

Digresk

Stabil

Mat eo bet an distro-skol en 10 kumun ma kaver ar muiañ a zeskidi. **Bez' eo Roazhon ar gumun** ma kaver **ar muiañ a zeskidi** (gwir eo ivez evit an niver a skolidi divyezhek), gant ur c'hresk en-dro en distro-skol-mañ e-touez al liveoù 1 ha 2. Chom a ra Naoned an eil kumun ma kaver ar muiañ a zeskidi. Ur c'hresk mat zo e Montroulez ma'z eus bet addigoret kentelioù (ne oa nemet al live 5 warlene).


Deroù ur c'hursus zo en Orient gant digoradur al live 2. Aet eo war-raok abaoe 2008 (ne oa nemet er 105^{vet} plas e distro-skol 2008 gant 10 deskard), en em gavet eo d'ar 16^{vet} plas en distro-skol-mañ. Met dale zo ganti e-keñver kumunioù all evel Kemper, Montroulez pe an Alre zoken. Gant ur c'hinnig kevredigezhel emeur en Orient, skoazellet gant un emglev bro.

N'eus deskard ebet ken gant ar c'hentelioù sizhuniek e Pondi peogwir eo echu gant ar c'hinnig : chomet eo skol Diwan Pondi a-sav gant ar c'hentelioù.

UR SELL WAR AR 6 VLOAZ TREMENET

Adskoulmañ a ra an departamantoù gant ar c'hresk er 6 vloaz diwezhañ.


Aodoù-an-Arvor



Ul lusk kreskiñ zo en Aodoù-an-Arvor er 6 vloaz tremenet, dreist-holl gant an deraouidi : daougementet eo bet o niver. Evit un darn vat e vez aozet ar c'hentelioù gant Ti ar Vro Treger-ha-Goueloù, ennañ ouzhpenn 50% eus an deskidi, e bro Treger-ha-Goueloù hag ul lodenn eus bro Gwengamp. Diorroet eo bet e rouedad kentelioù pa vode 25% eus deskidi an departamant 5 bloaz zo. Ar framm micherel zo aet ar muiañ war-raok eo : lieskementet eo bet dre 3 niver e zeskidi abaoe 2005 a-drugarez d'ar postoù kelennerien bet krouet (tremenet eus 1 post leunamzer da 2,75 e 2011).

En un hanter eus an departamant emañ ar c'hinnig evit ar mare hepken. Danvez zo da ziorren er reter ma'z eus kêrioù poblet dibourvez ha ma ra berzh ar c'hentelioù el lec'hioù ma vezont kinniget : Dinan eo ar 24^{vet} kumun ma kaver ar muiañ a zeskidi, muioc'h a zeskidi zo enni eget e Douarnenez da skouer.


Penn-ar-Bed



Gant ur c'hresk frank emeur gant an deraouidi e-kerzh an 2 vloaz diwezhañ. E 2011 eo par an niver a zeraouidi gant hini 2005 : kresk-digresk zo bet, met dre vras e vez 450 den o kregiñ gant ar yezh bep bloaz. Tuet eo al liveoù 2 ha 3 da greskiñ abaoe 2006 : **kollet e vez nebeutoc'h a dud** a-hed ar c'hursus ; muioc'h a frammoù micherel zo.


Chom a ra un nebeud lec'hioù dibourvez c'hoazh : war an aod en Norzh, e bro Montroulez (Gwerliskin, Ploueskad da skouer, lec'hioù ma oa ur c'hinnig betek 2009), e K.K. bro Pleiben pe hini ar Menez-Are (kentel ebet en Uhelgoad), nag er C'hab.

Il-ha-Gwilen




Kalonekaus eo bet emdroadur an niver a zeraouidi en Il-ha-Gwilen ma ne rae nemet kreskiñ abaoe 2008. Distreiñ a reer d'an niver a zeraouidi a oa 3 bloaz zo gant digresk an distro-skol. Warlene e oa bet digoret kentelioù evit an deraouidi gant Skol an Emsav Kendalc'het o deus el live 2 en distro-skol-mañ ha n'eus ket bet miret live an deraouidi el lec'hioù deskiñ-se. **Danvez** zo da zigeriñ lec'hioù kelenn en **norzh hag er su** ma m'eus kinnig ebet ken en distro-skol-mañ, daoust d'ar goulenn a oa.

Liger-Atlantel



Kresk-digresk eo al live deraouidi. Met gant kresk distro-skol 2011, disoc'h politikerezh diorren Kentelioù an Noz, ez eus muioc'h a zeraouidi e 2011 eget 6 vloaz zo. Bodet eo tost an 2/3 eus deskidi an departamant gant Kentelioù an Noz ha gantañ ez eus ur 1/4 a zeskidi ouzhpenn. Mod all e chom kevredigezhioù bihan a c'hall mont da get a-daol-trumm (kollet o deus 25% eus o skolidi er 5 bloaz diwezhañ). Takadoù bras enno kêrioù poblet (Ankiniz, Klison da skouer) a chom hep kinnig c'hoazh.


Mor-Bihan



Gwelloc'h e seblant bezañ an tremen eus al live deraouidi d'an eil bloavezh ivez eget en departamantoù all. Tu gwan an departamant eo n'eo ket aozet ar c'helenn gant frammoù a-vicher (1 post hepken en departamant). Bresk ha distabil eo ar c'hinnig dre-se. Abalamour da se n'eus kinnig ebet ken e kêr Pondi, 6^{vet} kumun an departamant evit an niver a skolidi divyezhek koulskoude.



KENTELIOÙ SIZHUNIEK WAR AL LEC'H LABOUR




Muioc'h a dud a heuilh stummadurioù war o lec'h labour eget warlene : war-dro 220 goprad pa oant 170 e 2010/2011. N'eur ket distro da live 2009 pa oa bet 250 deskard avat. Ar c'hinnig zo aet war-raok : 15 stummadur zo (11 warlene). An darn vrasañ anezho a vez kinniget gant strollegezhioù publik (12 diwar 15). Ar pep brasañ zo e Penn-ar-Bed. Roet ez eus bet lañs d'ur stummadur gant ti-kêr Roazhon, heuliet gant 30 den. An eil stummadur ma kaver ar muiañ a zeskidi eo goude hini Meurgêr Brest ha dirak Kuzul-departamant Penn-ar-Bed pe ti-kêr Kemper.

Danvez zo er Mor-Bihan (kuzul-departamant, Gwened, an Oriant...) hag Aodoù-an-Arvor (Lannuon, Gwengamp, S.Brieg) ma n'eus nemet 1 c'hinnig. Al Liger-Atlantel eo an departamant nemetañ hep kinnig.

STAJOÙ

AR C'HINNIG AET WAR RAOK EVIT AR STAJOÙ HIR

Lec'hioù staj - bloavezh 2011/2012




Ur c'hinnig zo e 13 bro (12 warlene). Chom a ra tiriadoù hep staj ebet, evel e **bro Treger-ha-Goueloù**, honnezh an 3^{de} bro e-keñver an niver a zeskidi er c'hentelioù sizhuniek koulskoude.

War-raok eo aet ar c'hinnig **stummadurioù hir. 5 lec'h** ouzhpenn zo bet digoret. Ur framm nevez zo war an dachenn (Mervent) hag ur c'hinnig war ar 5 departamant zo bremañ (digoradur Sant-Ervlan) a-drugarez da bolitikerezh Rannvro Breizh.



AR GOULENN STAJOÙ

Emdroadur an niver a stajidi



An niver a stajidi bet er stajoù – bloavezh 2010/2011

	Stajoù hir	Stajoù ur sizhunvezh	Stajoù dibenn- sizhun	HOLLAD	Kresk bloaziek
Aodoù-an-Arvor	19	80	123	222	70
Penn-ar-Bed	74	315	119	508	6
Il-ha-Gwilen	25	44	42	111	- 48
Liger-Atlantel	-	-	138	138	- 13
Mor-Bihan	42	56	107	205	45
BREIZH	160	495	529	1 184	60
E-maez Breizh	-	-	12	12	
HOLLAD	160	495	541	1 196	54
Emdroadur bloaziek	9	- 29	80	4,7%	
Emdroadur bloaziek e %	6,0%	-5,5%	17,8%		

Kresk

Digresk

Stabil

Un digresk a stader en niver a stajidi bet a heuilh stajoù ur sizhunvezh. Dont a ra an digresk-se eus ar frammoù a ginnig stajoù hir dreist-holl (Roudour, Skol an Emsav ha Stumdi) : 190 stajiad zo bet er stajoù ur sizhunvezh e 2010 pa oa bet 263 e 2009. Muioc'h a nerzh zo bet gouestlet d'ar stajoù hir. Kresk zo gant ar frammoù all a ginnig stajoù ur sizhunvezh avat : 300 stajiad zo bet e 2010/2011 ganto pa oa bet 262 e 2009/2010. Kresk zo bet gant stajoù KEAV pe ar Falz da skouer.


An niver a stajidi er stajoù ur sizhunvezh dre vro –bloavezh2010/ 2011

	Stajoù ur sizhunvezh	Kresk bloaziek
B.Gerne	223	26
B.Gwengamp	80	-18
B.Brest	72	-31
B.Roazhon	44	-11
B.Pondi	41	41
B.Kornôg Kreiz Breizh	21	-10
B.an Oriant	8	8
B.Montroulez	6	-4
B.Naoned	0	20
B.Breselien	0	-10
BREIZH	495	-29

E bro Gerne emañ ar muiañ a stajidi ur sizhunvezh (dre stajoù KEAV : tost un 1/2 eus ar stajidi o deus heuliet ur staj ur sizhunvezh zo bet ganto). Stabil a-walc’h eo bet ar c’hinnig. Dont a ra an digresk eus ar frammoù a ginnig stajoù hir. Un digresk a verzer e broioù Brest, Kornôg Kreiz Breizh pe Roazhon : nebeutoc’h a stajidi e-pad ur sizhun zo bet gant Stumdi, Roudour pe Skol an Emsav.

Kresk zo bet er stajoù ur sizhunvezh aozet e-kerzh hañv 2011 e-keñver hañv 2010. Danvez zo da ziorren ar stajoù ur sizhunvezh pa stader n’eus nebeutoc’h eger un 1/3 eus ar stajidi a implij ar programmoù skoazell evit arc’hantaouiñ o staj⁷.

An niver a stajidi er stajoù ur sizhunvezh-bloavezh 2010/2011



⁷ S.o Studiaden ar stajoù-hañv 2011- DAO-5 pajenn.


E 8 bro diwar 29 ez eus stajoù 1 sizhunvezh. Stabil eo ar c'hinnig, met digempouez eo : n'eus kinnig ebet e gevred Breizh. Stajidi ur sizhunvezh zo bet degemeret e bro Pondi dre staj ar Falz aozet er vro e 2011.

An niver a stajidi er stajoù dibenn-sizhun – bloavezh 2010/2011

	Stajoù dibenn- sizhun	Kresk bloaziek
B.Gwengamp	103	19
B.Naoned	76	8
B.an Oriant	68	26
B.Wenn hag ar Briver	62	10
B.Brest	48	48
B.Gerne	48	12
B.Roazhon	42	-30
B.an Alre	25	7
B.Montroulez	20	0
B.Sant-Brieg	20	12
B.Kêr-Wened	14	0
B.Kornôg Kreiz Breizh	3	-21
B.Gwiniegi-Naoned		-11
BREIZH	529	80
		17,8%

Kresk bras zo gant ar stajoù berr. **Bro Gwengamp** zo en-dro ar vro ma vez ar muiañ a stajidi oc'h heuliañ stajoù berr evel a-raok 2008. Kresk mat zo bet enni a-drugarez da stajoù **Studi-ha-Dudi** hag ar stajoù berr nevez kinniget gant Kalon Plouha. Addigoret ez eus bet stajoù berr e bro Brest ivez.

Chom a ra **Kentelioù an Noz** ar framm **a stumm ar muiañ a dud** dre ar stajoù dibenn-sizhun (ur 1/5 eus ar stajidi o deus heuliet ur staj berr e Breizh a-bezh) a-raok Studi-ha-Dudi. El Liger-Atlantel e kaver ar muiañ a stajidi bet oc'h heuliañ stajoù dibenn-sizhun evel e 2009/2010.





11 bro diwar 29 a ginnig stajoù berr.

Aet eo ar c'hinnig war-gil un tamm. Warlene dija ne oa kinnig ebet ken e bro Treger-ha-Goueloù : er bloaz-mañ eo aet ar c'hinnig da get e bro Gwiniegi Naoned ha n'eo ket ken bras ar c'hinnig e bro Kornog Kreiz-Breizh (n'eus ket bet aozet stajoù gant Gevred). Distro eo ar c'hinnig e bro Brest, stajoù berr zo bet kinniget gant Sked.

Talvoudus eo ar stajoù berr d'ar skolidi noz rak reiñ a ra tro dezho da vezañ en un endro brezhonek an devezh-pad, evit mont donoc'h ha buanoc'h gant an deskiñ. Dont a ra ur c'hinnig nevez war wel : ar stajoù aozet evit kerent ar skolidi divyezhek evit reiñ an tu dezho da vont e brezhoneg gant o bugale. Seurt stajoù zo aozet e bro Montroulez gant KLT abaoe 2010 pe en Alre gant Kerlenn Sten Kidna abaoe 2011 da skouer.


AR STUMMADURIOÙ HIR

Stummet e vez brezhonegerien e berr amzer dre ar stummadurioù stank. Ur pal micherel zo gant ar stajidi peurliesañ, disheñvel diouzh palioù ha c'hoantoù deskidi ar c'hentelioù all kinniget diouzh an noz da skouer. Gallout a ra ar stummadurioù bezañ arc'hantaouet gant stignadoù publik pa vezont kinniget gant un aozadur stummañ aotreet. Gallout a ra ar c'hopridi tennañ splot eus stignadoù ar stummadur dibaouez : ehan stummañ hiniennel, steuñvenn stummañ, gwir hiniennel d'ar stummadur (GHS). Evit ar glaskerien labour ez eus stignadoù a-ratozh, re Rannvro Breizh en o zouez : yalc'hadoù evit ar stajidi a fell dezho dont da vezañ kelenner, goprou evit ar stajidi pe ar chekenn nerzh.



En em ledet eo ar c'hinnig kalz. E 2004 e oa tu da heuliañ ur stummadur hir e 2 lec'h (Landerne ha Plañvour) gant 1 framm, Stumdi. E 2011/2012 e c'haller heuliañ stummadurioù e 10 lec'h gant 3 framm ouzhpenn (Roudour hag a ginnig stajoù hir abaoe 2005, Skol an Emsav abaoe 2007 ha Mervent abaoe 2011).

An niver a stajidi er stummadurioù hir



* Rakweladennoù evit stajoù stummadur uhel Ebrel 2012 diouzh ar plasoù bet roet gant Kuzul-rannvro Breizh

Kresket eo an niver a stajidi e 2010/2011 hag ul lamm a zlefe bezañ c'hoazh e 2011/2012. Ouzhpenn 200 den zo o vont da vezañ stummet dre ar stummadurioù-se, da lavaret eo 60 stajiad ouzhpenn en ur ober bloaz (**tric'hementet** an niver a vrezhonegerien nevez stummet dre ar stajoù hir e keñver 6 bloaz zo).

Stummadurioù hep diplom eo ar pezh a vez kinniget. Met dre an **Diplom Barregezh war ar Yezh** (DBY), astennet d'ar brezhoneg e fin 2010, e c'hall ar stajidi talvoudekaat o stummadur. **Un araokadenn** vras eo evit bed ar c'helenn d'an oadourien hag ar brezhoneg dre-vras. Reiñ a ra an tu da briziañ spisoc'h an niver a dud deuet stummet war ar yezh bep bloaz. Berzh a ra. E Kerzu 2010 eo bet tremenet an DBY gant 70 den (40 e Roazhon ha 30 e Brest). 170 den o deus bet an diplom e dalc'h Mezheven 2011.

An niver a stajidi er stummadurioù hir dre vro –bloavezh 2010/2011

	Stajoù hir	Kresk bloaziek
B.Brest	49	5
B.an Oriant	42	-20
B.Gerne	19	12
B.Roazhon	25	3
B.Kornôg Kreiz Breizh	6	-6
B.Gwengamp	19	15
BREIZH	160	9
		6%

Kenderc'hel a ra an niver a stajidi da greskiñ un tamm e 2010/2011. Nebeutoc'h a stajidi zo bet e Plañvour avat pa gresk mat e Gwengamp.

PELLGELENNEREZH

Deuet ez eus un **araokadenn** vras e 2011 war dachenn ar pellgelennerezh. Gallout a reer deskiñ enlinenn abaoe miz Here 2011 a-drugarez da Edubreizh. War-dro 30 den a zesk brezhoneg da vat gant ar c'hinnig-se ha 250 den o deus lakaet o anv er forom eskemm.

An darn vrasañ eus an dud hag a zesk dre lizher a ra gant kentelioù Skol Ober : 375 den a zesk brezhoneg dre lizher gant Skol Ober evit 2011/2012.

AR VREZHONEGERIEN STUMMET DRE AR C'HELENN D'AN OADOURIEN

Hentad **ar c'hentelioù noz** eo a stumm **ar muiañ** a dud deuet. 950 den zo e fin o red deskiñ (live 4 ha muioc'h) ha mont a ra o niver war greskiñ (+50). Met an doare hirañ eo ivez avat : ret eo kontañ 6 vloaz evit stummañ brezhonegerien ha kalz a dud a chom a-sav a-hed ar c'hursus c'hoazh. Diwar an 950 den enskrivet el liveoù uhelañ e c'haller brasjedin da 320 (dilezioù, deskidi a chom meur a vloaz el liveoù uhelañ, strolladoù komz pe stalioù-labour a stroll yezherien bet stummet c'hoazh) ar re a c'hall bezañ sellet outo evel yezherien peurstummet er bloaz-mañ.


Soñjet ez eus bet e stummadurioù all (daoulamm) anezho stummadurioù berroc'h hag efedusoc'h evit respont d'an dud a fell dezho mont buanoc'h ganti : 3 eurvezh pe 6 eurvezh kentel dre sizhun. Kinnig a ra Mervent ur c'hursus war daou pe dri bloavezh d'an dud evit dont da vezañ yezher. Nevez eo ar stumm-se ha n'eo ket ledanaet (8 den zo war stummañ evit ar bloavezh 2011/2012).

An doare **efedusañ** evit dont da vezañ brezhoneger eo ar **stajoù hir**. 160 den o deus heuliet ar stummadurioù-se e-kerzh 2010/2011. Evito da vezañ efedus, ur c'holl bihan a c'hall bezañ. Brasjediñ a reer da 145 an niver a stajidi stummet.

Er stajoù ur sizhunvezh pad ez eus kalzik a dud ivez, alies e vez tud na c'hallont ket tapout un ehan 6 miz evit deskiñ ar yezh : tost un hanter eus ar stajidi bet e 2010/2011 hag ouzhpenn ur ¼ anezho zo bet el liveoù uhelañ. Brasjediñ a c'haller ober da 1 diwar 4 (abalamour d'an dilezioù, d'ar re bet kontet evel yezher stummet er c'hentelioù sizhuniek) ar re stummet da vat, da lavaret eo 45 e 2011 neuze.

Brasjediñ a c'haller ez eus bet stummet war-dro 500 yezher gant hentad ar c'heleñn d'an oadourien e 2011 neuze.

Ar vrezhonegerien nevez stummet gant hentad ar c'helenn d'an oadourien




Kreskiñ a ra an niver a yezherien nevez : war-dro 250 yezher nevez a veze stummet e 2004 ; daougementet eo bet o niver bremañ pa istimer ez eus bet stummet 500 yezher nevez pe war-dro e 2011.

AR C'HINNIG KENTELIOÙ E-MAEZ BREIZH

Renablet ez eus bet 35 lec'h deskiñ e-maez Breizh. Un 1/3 eus al lec'hioù-se zo e Pariz ha bro Pariz. Ur c'hinnig mat a-walc'h zo e Broioù al Liger hag e kornôg Frañs, ar pezh n'eus ket e Normandi avat.


Er bed a-bezh ez eus kentelioù, eus **Toronto betek Sydney** : renablet hon eus 21 lec'h a ginnig kentelioù e-maez Frañs e 14 bro war 3 c'hevandir (an darn vrasañ anezho e skolioù-meur).

Kentelioù e maez Breizh –distro-skol 2011



● Kumunioù enno **kentelioù noz**

Kentelioù e skolioù-meur pe gant kevredigezhioù e 2011/2012



KLOZADENN

Kresk zo bet e 2011 en holl zoareoù deskiñ : er c’hentelioù sizhuniek, er stajoù hag er pellgelennerezh ma’z eus bet roet lañs d’un doare nevez da zeskiñ ar yezh **enlinenn**, krouet gant Edubreizh. Un araokadenn vras e vo evit respont da ezhommoù ar gevredigezh a-vremañ.

Un tamm muioc’h a dud zo bet **stummet** war ar brezhoneg e 2011 (war-dro 500) eget 2010 (485)neuze. Nerzh zo bet lakaet gant ar frammoù a-vicher war ar stajoù hir, ar pezh a c’hall displegañ ar c’hollo zo bet en niver a stajidi bet degemeret e-pad ur sizhun gant ar frammoù-se.

Diorroet eo bet an hentad kentelioù sizhuniek gant ar frammoù a vicher. Ganto dreist-holl ez eus bet digoret lec’hioù deskiñ en distro-skol-mañ. Hent ar micherelaat eo an hent efedusañ evit kreñvaat an hentad ha mont war-raok : + 35% a zeskididi zo gant ar frammoù micherel e-kenver 5 bloaz zo pa vez -10% a zeskididi gant ar c’hevredigezhioù mod all. Dalc’h pennañ ar c’helenn d’an oadourien a chom ar frammañ, a chom bresk er Mor-Bihan dreist-holl.

